

928
力

河嶽英靈集

四庫全書

集
河

靈
泉





河嶽英靈集

四部叢刊集部

上海涵芬樓借嘉
興沈氏藏明刊本
景印原書板匡高
營造尺五寸二分
寬四寸二分

河嶽英靈集



唐丹陽進士殷璠

叙曰夫文有神來氣來情來有雅體野體鄙體
俗體編紀者能審鑒諸體委詳所來方可定其
優劣論其取舍至如曹劉詩多直語少切對或
五字並側或十字俱平而逸駕終存然挈瓶庸
受之流責古人不辯宮商徵羽詞句質素恥相
師範於是攻異端妄穿鑿理則不足言常有餘
都無興象但貴輕艷雖滿篋笥將何用之自蕭
氏以還尤增矯飾武德初微波尚在貞觀末標

格漸高景雲中頗通遠調開元十五年後聲律
風骨始備矣寔由主上惡華好朴去僞從真使
海內詞場翕然尊古南風周雅稱闡今日播不
揆竊嘗好事願刪略群才贊聖朝之美爰因退
跡得遂宿心粵若王維昌齡儲光羲等二十四
人皆河嶽英靈也此集便以河嶽英靈爲號詩
二百三十四首分爲上下卷起甲寅終癸巳論
次于叙品藻各冠篇額如名不副實才不合道
縱權壓梁竇終無取焉

集論

論曰昔伶倫造律蓋爲文章之本也是以氣因
律而生節假律而明才得律而清焉寧預於詞
場不可不知音律焉孔聖刪詩非代議所及自
漢魏至于晉宋高唱者十有餘人然觀其樂府
猶有小失齊梁陳隋下品實繁專事拘忌彌損
厥道夫能文者匪謂四聲盡要流美八病咸須
避之縱不拈綴未爲深缺即羅衣何飄飄長裾
隨風還雅調仍在況其他句乎故詞有剛柔調
有高下但令詞與調合首末相稱中間不敗便

是知音而沈生雖怪曹王曾無先覺隱侯言之
更遠璠令所集頗異諸家既閑新聲復曉古體
文質半取風騷兩挾言氣骨則建安爲傳論宮
商則太康不逮將來秀士無致深憾

河嶽英靈集姓氏

卷上

常建十五首

李白十三首

王維十五首

劉昫虛十一首

張渭六首

王季友六首

陶翰十一首

李頎十四首

高適十三首

卷中

岑參七首

崔顥十一首

薛據十首

綦毋潛六首

孟浩然六首

崔國輔十三首

儲光羲十二首

王昌齡十六首

賀蘭進明七首

卷下

崔署六首

王灣八首

祖詠六首

盧象七首

李疑五首

閻防五首

河嶽英靈集姓氏

唐河嶽英靈集目錄

唐丹陽進士殷璠集

切見詩之流傳于世多矣若唐之河嶽英靈中興間氣則世所罕見焉本堂今得此本編次既當批摘又精真詩中無價寶也敬錄諸梓與朋友共之四遠詩壇幸垂

藻鑑

謹啓

卷之上

常建

夢太白西峯

吊王將軍墓

昭君墓

江上琴興

宿王昌齡隱處

送李十一尉臨溪

閑齋臥疾行樂至山館稍次湖亭作

題破山寺後禪院

鄂渚招王昌齡張僨

春詞二首

古意張公子

仙谷遇毛女意知是秦時宮人

晦日馬鐙曲稍次中流作

李白

戰城南

送別離

野田黃雀行

蜀道難

行路難

夢遊天姥山別東魯諸公

憶舊遊寄譙郡元參軍

詠懷

醉東魯小吏以斗酒雙魚見贈

荅俗人問

古意

將進酒

烏棲曲

王維

西施篇

偶然作

贈劉藍田

入山寄城中故人

淇上別趙仙舟

春閨

寄崔鄭山人

息夫人怨

婕妤怨

漁山神女瓊智祠二首

送神

隴頭吟

少年行

初出濟州別城中故人

送綦毋潛落第還鄉

劉春虛

海上詩送薛文學歸海東

送東林廉上人還廬山

送韓平兼郭微

寄閻防

楊子江寄孟浩然

寄江滔求孟六文

尋陽陶氏別業

登廬山峰頂寺

尋東溪還湖上作

越中問海客

江南曲

張渭

讀後漢逸人傳

其二

同孫構免官後登薊樓

贈喬林

湖上對酒作

題長主人壁

王季友

雜詩

代賀枝令譽贈沈千運

觀于舍人壁画山水

滑中贈崔高士瓘

山中贈十四秘書兄

贈李十六岐

陶翰

古塞下曲

燕歌行

贈鄭貞外

望太華贈盧司倉

晚出伊闕寄河南裴丞

贈房侍御

經殺子谷

乘潮至魚浦作

宿天竺寺

早過臨淮

出蕭關懷古

李頎

謁張果老先生

送暨道士還玉清觀

東郊寄萬楚

登首陽山謁夷齊廟

題綦毋潛書所居

漁父歌

古意

送康洽入京進樂府

送陳章甫

聽董大彈胡笳聲兼語弄寄房給事

緩歌行

蛟人歌

送盧逸人

野老曝背

高適

哭單府梁九少府

宋中遇陳兼

宋中

九日酌顧少府

見薛大臂鷹作

酌岑主簿秋夜見贈

送韋參軍

封丘作

邯鄲少年行

燕歌行

行路難

塞上聞笛

營州歌

卷中

岑參

終南雙草堂作

終南雲際精舍尋
澄上人
不遇歸

戲題關門

觀釣翁

戎葵花歌

偃師東與韓樽同訪景雲暉上人

春夢

崔顥

贈王威古

古遊俠呈軍中諸將

送單于裴都護

江南曲

贈懷一上人

定襄陽郡獄

遼西

孟門行

霍將軍篇

鴈門胡人歌

黃鶴樓

薛據

古興

初去郡齊書請

落第後口號

題丹陽陶司馬廳

冬夜寓居寄儲大祝

懷哉行

泊震澤口

西陵口觀海

登秦望山

出青門往南山下別業

慕母潛

春泛若耶

題招隱寺絢公房

題鶴林寺

題雲隱寺山頂院

送儲十二還莊城

若耶溪逢孔九

孟浩然

過景空寺故融公蘭若

過上人蘭若

裴司戶貞司士見荅

九日懷襄陽

歸故園作

夜歸鹿門歌

崔國輔

雜詩

石頭瀨作

魏宮詞

怨詞

少年行

長安草

香風詞

詩酒吟

漂母吟

湖南曲

秦中感興寄遠上人

夜渡湘江

渡浙江問舟中人

儲光羲

雜詩 二章

效古 二章

猛虎詞

射雉詞

採蓮詞

牧童詞

田家事

寄孫山人

酌綦母校書夢遊耶溪見贈之作

使過彈箏峽作

王昌齡

詠史

觀江淮名山圖

香積寺禮拜萬廻平等二聖僧谷齋心
維氏尉沈興宋置酒南溪留贈

江山聞笛

東京府縣諸公送至白馬寺宿

趙十四見尋

少年行

聽人流水調

長歌行

城傍曲

塞下曲

長信

鄭縣陶大公館中贈馮六元二

從軍行

賀蘭進明

古意二章

行路難二首

卷之下

崔署

宿大通敬贈如閣梨廣心長孫錡

穎陽東溪懷古

途中晚發

送薛據之宋州

早發交崖山還大室作

登水門樓見亡友張真期題望黃河

王鸞

晚春詣蘇州敬贈武貞外

哭補闕綦毋學士

池亭即事寄京東一二知己

奉使登終南山

奉同賀監林月清酌

江南意

觀插箏

閏月七日織女

祖詠

古意

遊蘇氏別業

清明宴司勳劉郎中

宿陳留李少府廳作

終南望餘雪作

盧象

家叔徵君東溪草堂二首

送綦母潛

送祖詠

贈程祕書

贈張均負外

追涼歷下古城西北隅清泉喬木

李疑

林園秋夜作

河南秋夜呈同僚

少年行三首

閻防

晚秋石門禮拜

宿岍道人精舍

夕以鹿門山作

百丈溪新理茅茨讀書

與永洛諸公泛黃河作

唐河嶽英靈集目錄終

河岳英靈集上

唐音詩

唐丹陽進士殷璠集

常建

高才無貴士誠哉是言曩劉楨死於文學
左思終於記室鮑昭卒於參軍今常建亦
淪於一尉悲夫建詩似初發通莊却尋野
徑百里之外方歸大道所以其旨遠其興
僻佳句輒來唯論意表至如松際露微月
清光猶為君又山光悅鳥性潭影空人心
此例十數句並可稱警策然一篇盡善者

戰餘落日黃軍敗鼓聲死今與山鬼鄰殘
兵哭遼水屬思既苦詞亦警絕潘岳雖云
能叙悲怨未見如此章

夢太白西峰

夢寐升九崖香藹逢元君遺我太白岑寥寥辭
垢氛結宇在星漢宴林閉氛氲簷楹覆餘翠巾
鳥生片雲時往清溪間孤亭晝仍曛松峰引天
影石瀨清霞文恬日緩舟趣霽心投鳥羣春風
有搖權潭島花紛紛

吊王將軍墓

嫖姚北伐時深入強千里戰餘落日黃軍敗鼓
聲死嘗聞漢飛將可奪單于壘今與山鬼隣殘
兵哭遼水

昭君墓

漢宮豈不死異域傷獨歿萬里駝黃金蛾眉爲
枯骨迴車夜出塞立馬皆不發共恨丹青人墳
上哭明月

江上琴興

江上調玉琴一絃清一心泠泠七絃遍萬木澄
幽陰能使江月白又令江水深始知枯桐枝可

以徽黃金

陰一作音

宿王昌齡隱處

清溪深不極，隱處惟孤雲。
松際露微月，清光猶爲君。
苑亭宿花影，藥院滋苔紋。
予亦謝時去，西山鸞鶴羣。

送李十一尉臨溪

泠泠花下琴，君唱度江吟。
天際一帆影，預懸離別心。
以言神仙尉，因致瑤華音。
軫起宮商調，越聲澄碧林。

閑齋臥疾行藥至山館稍次湖亭作

旬時結陰林，簷外初白日。
齋沐清病容，心竟畏靈室。
閑梅照前戶，明鏡悲舊質。
同袍四五人，何不來問疾。
行藥至石壁，東風變萌芽。
主人門外綠，小隱湖中花。
時物堪獨往，春帆宜別家。
辭君向滄海，爛熳從天涯。

題破山寺後禪院

清晨入古寺，初日照高林。
竹逕通幽處，禪房花木深。
山光悅鳥性，潭影空人心。
萬籟此都寂，但餘鐘磬音。

鄂渚招王昌齡張儉

刈蘆曠野中沙上飛黃雲天海無精光芒茫悲
遠君楚山隔湘水湖畔落日曛春雁又北飛音
書固難聞謫居未爲嘆讒枉何由分五日逐蛟
龍宜爲吊冤文翻覆古共然官宦安足云貧士
任祐禍捕魚清江瀆有時荷鋤犁曠野自耕耘
不然春山隱溪澗花氛氳山鹿自有場賢達亦
顧群二賢歸去來世上徒紛紛

春詞二首

宛宛黃柳絲濛濛雜花垂日高紅粧卧倚樹春
風遲寧知傍淇水腰裊黃金羈

翳翳陌上桑南枝交北堂美人金梯出手自提
竹筐非但畏蠶饑盈盈嬌路傍

古意張公子

日出乘釣舟娟娟持釣竿涉淇傍荷花驄馬閑
金鞍使客白雲中腰間懸鹿盧出門事嫖姚爲
君西擊胡胡兵漢騎相馳逐轉戰孤軍海西北
百尺旌竿沉墨雲邊笳落日不堪聞

仙谷遇毛女意知是秦時宮人

溪口水石淺泠泠明藥叢入溪雙峰峻松栝踈
幽風垂嶺枝娟娟翳泉花濛濛寅綠霽人目路

盡心彌通盤石橫陽崖前臨殊未窮迴潭清雲
影瀾漫長天空水邊一神女千歲爲玉童羽毛
經漢代珠翠逃秦宮目覩神已寓鶴飛言未終
祈君青雲秘願謁黃仙翁嘗以耕玉田龍鳴西
頃中金梯與天接幾日來相逢

晦日馬鑿曲稍次中流作

夜寒宿蘆葦曉色明西林初日在江上便澄游
子心晴天無纖翳郊野浮春陰波靜隨釣魚舟
小綠水深出浦見千里曠然諧遠尋扣舷應漁
父因唱滄浪吟

李白

白性嗜酒志不拘檢常林栖十數載故其
爲文章率皆縱逸至如蜀道難等篇可謂
奇之又奇然自騷人以還鮮有此體調也

戰城南

去年戰桑乾源今年戰葱河道洗兵條支海上
波放馬天山雪中草萬里長征戰三軍盡衰老
胡人以殺戮爲耕作古來唯見白骨黃沙田秦
家築城避胡處漢家還有烽火然烽火然不息
長征無已時野戰格鬪死敗馬號鳴向天悲烏

五
一
鳶啄人腸，嚙飛上挂枯桑枝。士卒塗草莽，將軍空爾爲。乃知兵者是凶器，聖人不得已而用之。

遠別離

古有皇英之二女，乃在洞庭之南，瀟湘之浦。海水直下萬里深，人言不深此離苦。日慘慘兮雲冥冥，徃徃啼烟兮鬼嘯雨。我縱言之將何補，皇穹切恐不照予之忠誠。雷憑憑兮欲吼怒，堯舜當之亦禪禹。君失臣兮龍爲魚，權歸臣兮鼠變虎。堯幽囚，舜野死，九疑聯綿皆相似。重瞳孤墳竟誰是，帝子降兮綠雲間。隨風波兮去無還，動哭兮遠望，見蒼梧之深山。蒼梧崩，湘水絕，竹上之淚乃可滅。

野田黃雀行

游莫逐炎洲翠，栖莫近吳宮燕。炎洲逐翠遭網羅，吳宮火起焚爾窠。蕭條兩翅蓬蒿下，縱有鷹鷂奈爾何。

蜀道難

噫吁嚱，危乎高哉！蜀道之難，難於上青天。蚕叢及魚鳧，開國何茫然。爾來四萬八千歲，不與秦塞通人烟。西當太白有鳥道，可以橫絕峨眉巔。

地崩山摧壯士死然後天梯石棧相勾連上有
橫河斷海之浮雲下有衝波逆折之迴川黃鶴
之飛尚不得過猿猴欲度愁攀綠青泥何盤盤
百步九折縈巖巒捫參歷井仰脅息以手拊膺
坐長歎問君西游何當還畏途巉崑不可攀但
見悲鳥號枯木雄飛雌從遶林間又聞子規啼
夜月愁空山蜀道之難難於上青天使人聽此
彫朱顏連峰去天不盈尺枯松倒挂倚絕壁飛
湍瀑流爭喧豕砢崖轉石萬壑雷其險也若此
嗟爾遠道之人胡爲乎來哉劍閣崢嶸而崔嵬
一夫當關萬人莫開所守或匪人化爲狼與豺
朝避猛虎夕避長蛇磨牙吮血殺人如麻錦城
雖云樂不如早還家蜀道之難難於上青天側
身西望長咨嗟

行路難

金罍清酒價十千玉盤珍羞直萬錢停杯投筋
不能食拔劍四顧心茫然欲度黃河水塞川將
登太行雲暗天間來垂釣坐溪上忽復乘舟落
日邊行路難道安在長風破浪會有時直挂雲
帆濟滄海

夢遊天姥山別東魯諸公

海客談瀛州烟波微茫不易求
越人語天姥雲霓明滅如何覩
天姥連天向天橫勢拔五嶽掩赤城
天姥四萬八千丈對此絕倒東南傾
我欲冥搜夢吳越一夜飛度鏡湖月
湖月照我影送我到剡溪謝公宿處
今尚在綠水蕩漾青猿啼脚穿謝公屐
夜明登青雲梯半壁見海日空中聞天雞
千崑萬轉路不定迷花倚石忽以瞑
熊咆龍吟殷岩泉慄深林兮驚層巔
楓青青兮欲雨水澹澹兮生烟列缺霹靂
丘巒崩摧洞天石扉

乍然而中開青冥濛鴻不見底日月照耀金銀
臺霓爲裳兮風爲馬雲中君兮紛紛而來下虎
鼓琴兮鸞回車仙之人兮列如麻忽魂悸兮目
眦恍驚起兮長嗟惟覺時之枕席失向來之烟
霞世間行樂皆如是古來萬事東流水別君去
兮何時還且放白鹿青崖間欲行即騎向名山
何能摧眉折腰事權貴暫樂酒色彫朱顏一作使我不得開心顏

憶舊游寄譙郡元參軍

憶昔洛陽董糟丘爲予天津橋南造酒樓黃金

白壁買歌笑一醉累月輕王侯四海賢豪青雲
客與君一遇心莫逆迴山轉海不作難傾情倒
意無所惜我向淮南攀桂枝君留洛北愁夢思
不忍別還相隨相隨迢迢訪仙城三十六曲水
迴繁一溪初入千花明萬壑度盡松風聲銀鞍
金絡到平地漢東太守來相迎紫陽之真人邀
我吹玉笙飡霞樓上動仙樂嘈然宛似鸞鳳鳴
袖長管摧欲輕舉漢東太守醉起舞手持錦袍
覆我身我醉橫眠枕其股當筵意氣凌九霄星
離雨散不終朝分飛楚關山水遙余既還山尋

故巢君亦西歸度渭橋君家嚴君勇貔虎作尹

并州遇戎虜五月相呼度太行推輪不道羊腸
苦行來北京歲月深感君貴義輕黃金瓊杯綺
食青玉案使我醉飽無歸心時時出向城西曲
晉祠流水如碧玉浮舟弄水簫鼓鳴微波龍鱗
莎草綠興來携妓恣經過其若楊花似雪何紅
粧欲醉宜斜日百尺清潭寫翠娥嬋娟初月輝
美人更唱舞羅衣清風吹歌入空去歌曲自繞
行雲飛此時歡樂難再遇西游因獻長楊賦北
闕青雲不可期東山白首還歸去渭橋南頭一

遇君鄮臺之北又離羣問余恨別今多少落花
春暮爭紛紛言亦不可盡情亦不可極呼兒長
跽緘此辭寄君千里遙相憶

詠懷

莊周夢胡蝶胡蝶爲莊周一體更變易萬事良
悠悠乃知蓬萊水復作清淺流青門種瓜人昔
日東陵侯富貴苟如此營營何所求

酬東都小吏以斗酒雙魚見贈

魯酒琥珀色汶魚紫錦鱗山東豪更有俊氣手
携此物贈遠人意氣相傾兩相顧斗酒雙魚表
情素雙鯉呀呷鬢鬣張跋刺銀盤欲飛去呼兒
拂几霜刃揮紅肥花落白雪霏爲君下筯一食
罷醉著金鞍上馬歸

荅俗人問

問余何事栖碧山笑而不荅心自閑桃花流水
杳然去別有天地非人間

古意

白酒初熟山中歸黃雞啄黍秋正肥呼童烹雞
酌白酒兒女嬉笑牽人衣高歌取醉欲自慰起
舞落日爭光輝游說萬乘苦不早着鞭跨馬涉

遠道會稽愚婦輕買臣余亦辭家西入秦仰天
大笑出門去我輩豈是蓬蒿人

將進酒

君不見黃河之水天上來奔流到海不復回君
不見高堂明鏡悲白髮朝如青絲暮成雪人生
得意須盡歡莫使金樽空對月天生我才必有
用千金散盡還復來烹羊宰牛且爲樂會須一
飲三百杯岑夫子丹丘生與君歌一曲請君爲
我傾一作鐘鼎玉帛不足悅一作貴但願長醉不
用醒一作願古來聖賢皆寂寞惟有飲者留其名

陳王昔日宴平樂斗酒十千恣譎詐主人何爲
言少錢且須酤酒對君酌五花馬千金裘呼兒
將出換美酒與爾同消萬古愁

烏棲曲

姑蘇臺上烏棲時吳王宮裏醉西施吳歌楚舞
歡未畢青山猶銜半邊日金壺丁丁漏水多起
看秋月墜江波東方漸高奈爾何

王維

維詩詞秀調雅意新理愜在泉爲珠着壁
成繪一句一字皆出常境至如落日山水

好漾舟信歸風又澗芳襲人衣山月映石
壁天寒遠山淨日暮長河急日暮沙漠睡
戰聲烟塵裏

西施篇

艷色天下重西施寧久微朝仍越溪女暮作吳
宮妃賤日豈殊衆貴來方悟稀要人傳香粉不
自着羅衣君寵益嬌態君憐無是非常時浣紗
伴莫得同車歸寄謝隣家女效顰安可希

偶然作

陶潛任天真其性耽嗜酒自從棄官來家貧不
能有九月九日時菊花空滿手心中竊自思儂
有人送否白衣携觴來果不違老叟且喜得斟
酌安問升與斗奮衣野田中今日嗟無負兀傲
迷東西蓑笠不能守傾倒強行行酣歌歸五柳
生事不曾問肯愧家中婦

贈劉藍田

籬間犬迎吠出屋候荆扉歲晏輸井稅山村人
夜歸晚田始家食餘布成我衣詎肯無公事煩
君問是非

入山寄城中故人

中歲頗好道晚家南山隅興來每獨往勝事空
自知行到水窮處坐看雲起時偶然值林叟談
笑無還期

淇上別趙仙舟

相逢方一笑相送還成泣祖席已傷離荒城復
愁入天寒遠山淨日暮長河急解纜君已遙望
君猶佇立

春閨

新粧可憐色落日捲簾帷淑氣清珍簾墻陰上
玉墀春虫飛網戶暮雀隱花枝向晚多愁思閉

窓桃李時

寄崔鄭二山人

翩翩京華子多出金張門幸有先人業思逢明
主恩童年且未學肉食鶩華軒豈知中林士無
人薦至尊鄭生老泉石崔子安丘樊賣藥不二
價著書仍萬言息陰無惡木飲水必清源余賤
不及議斯人竟誰論

息夫人怨

莫以今時寵能忘舊日恩看花滿眼淚不共楚
王言

婕妤怨

宮殿生秋草君王恩幸踈
那堪聞鳳吹門外度
金輿

漁山神女瓊智祠二首

迎神

坎坎擊鼓漁山之下吹洞簫
望極浦女巫進紛
屢舞陳瑤席湛清醑
風淒淒而夜雨不知神之
來不來使我心苦

送神

紛進拜兮堂前日眷眷兮瓊
筵來不語兮意不

傳作暮雨兮愁空山悲急
莞思繁絃神之駕兮
儼欲旋條雲消兮雨歇
山青青兮水潺湲

隴頭吟

長安少年遊俠客
夜上戍樓看太白
隴頭明月迥臨關
隴上行人夜吹笛
關西老將不勝愁
駐馬聽之雙淚流
身經大小百餘戰
麾下偏裨萬戶侯
蘇武纔爲典屬國
節旄落盡海西頭

少年行

一身能擘兩彫弧
虜騎千重只似無
偏坐金鞍調白羽
紛紛射殺五單于

初出濟州別城中故人

微官易得罪謫去濟川陰執政方持法明君無
此心間閩河潤上井邑海雲深縱有歸來日多
愁年鬢侵

送綦母潛落第還鄉

聖代無隱者英靈盡來歸遂令東山客不得顧
採薇既至君門遠孰云吾道非江淮度寒食京
兆縫春衣置酒臨長道同心與我違行當浮桂
棹未幾拂荆扉遠樹帶行客孤村當落暉吾謀
適不用勿謂知音稀

劉昫虛

昫虛詩情幽興遠思苦語竒忽有所得便
驚衆聽頃東南高唱者數人然聲律宛態
無出其右唯氣骨不逮諸公自永明已還
可傑立江表至如松色空照水經聲時有
人又滄溟千萬里日夜一孤舟又歸夢如
春水悠悠遶故鄉又駐馬渡江處望鄉待
歸舟又道由白雲盡春與清溪長時有落
花至遠隨流水香開門向溪路深柳讀書
堂幽映每白日清暉照衣裳並方外之言

也惜其不永天碎國寶

海上詩送薛文學歸海東

日處歸且遠送君東悠悠滄溟千萬里日夜一
孤舟曠望絕國所微茫天際愁有時近仙境不
定若夢遊或見青色古孤山百里秋前心方杳
眇此路勞夷猶離別惜吾道風波敬皇休春浮
花氣遠思逐海水流日暮驪歌後永懷空滄洲

送東林廉上人還廬山

石溪流已亂苔徑入漸微日暮東林下山僧還
獨歸常爲墟峰意况與遠公違道生深寂莫廿
時多是非會尋名山去豈復無清機

送韓平兼寄郭微

上客夜相過小童能酤酒卽爲臨水處正值雁
歸後前路望鄉山近家見門柳到時春未暮風
景自應有余憶東州人經年別來久慙勤爲傳
語日夕念携手兼問前寄書書中復達否

寄閻防

防時在終南豐德寺讀書

青暝南山口君與緇錫隣深路入古寺亂花隨
暮春紛紛對寂寞往往落衣巾松色空照水經
聲時有人晚心復南望山遠情獨親應以修德

業亦惟此立身深林度空夜烟月鎖清真莫嘆
文明日彌年從隱淪

暮秋楊子江寄孟浩然

木葉紛紛下東南日烟霜林山相晚暮天海空
青蒼暝色空復久秋聲亦何長孤舟兼微月獨
夜仍越鄉寒笛對京口故人在襄陽詠思勞今
夕漢江遙相望

寄江滔求孟六遺文

南望襄陽路思君情轉親偏知漢水廣應與孟
家隣在日貪爲善昨來聞更貧相如有遺草爲

一問家人

潯陽陶氏別業

陶家習先隱種柳長江邊朝夕潯陽縣白衣來
幾年霽雲明孤嶺秋水澄寒天物象自清曠野
荷何綿聯蕭蕭丘中賞明宰非徒然願守黍稷
稅歸耕東山田

登廬山峰頂寺

孤峰臨萬象秋氣何高清庭際南郡出林端西
江明山門二緇叟振錫聞幽聲心照有無界業
懸前後生徒知真機靜尚與愛網并方首金門

路未遑叅道情

尋東溪還湖中作

出山更回首日暮清溪深東嶺新別處數猿叫
空林昔遊初有迹此路還獨尋幽興方在往歸
懷復爲今雲峰勞前意湖水成遠心望望已起
越坐鳴舟中琴

越中問海客

風雨滄洲暮一帆今始歸自云發南海萬里速
如飛初謂落何處永將無所依冥茫漸西見山
色越中微誰念去時遠人經此路希白舟悲且

泣使我亦沾衣浮海焉用說憶鄉難久違縱爲
魯連子山路有柴扉

江南曲

美人何蕩養湖上風日長玉手欲有贈徘徊雙
明璫歌聲隨綠水怨氣起青陽日暮還家望雲
波橫洞房

張謂

謂代北州老翁蒼及湖中對酒行在物情
之外但衆人未曾說耳亦何必歷遐遠探
古迹然後始爲冥搜

讀後漢逸人傳二首

子陵沒已久讀史思其賢誰謂潁陽人千秋如
比肩嘗聞漢皇帝曾是曠周旋名位苟無心對
君猶可眠東過富春渚樂此佳山川夜卧松下
月朝看江上烟釣時如有待釣罷應忘筌生事
在林壑悠悠經暮年于今七里瀨遺迹尚依然
高臺竟寂寞流水空潺湲

其二

龐公南郡人家在襄陽里何處偏來往襄陽東
陂是誓將業田種終得保妻子何言二千石乃
欲勸吾仕鶴鵲巢茂林鼉鼉穴深水萬物從所
欲吾心亦如此不見鹿門山朝朝白雲起采藥
復采樵優游終暮齒

同孫搆免官後登薊樓

昔在五陵時年少亦強壯嘗矜有奇骨必是封
侯相東走到營州投身事邊將一朝去鄉國十
載履亭障部曲皆武夫功成不相讓猶希虜塵
動更取林胡帳去年大將軍忽負樂生謗北別
傷士卒南遷死炎瘴濩落悲無成行登薊丘上
長安三千里日夕西南望寒沙榆關沒秋水藥

河漲策馬從此辭雲中保閑放

贈喬林

去年上策不見收今年寄食仍淹留
羨君有酒能便醉羨君無錢能不憂
如今五侯不待客羨君不問五侯宅
如今七貴方自尊羨君不過七貴門
丈夫會應有知己世上悠悠何足論

湖中對酒作

夜坐不厭湖上月晝行不厭湖上山
眼前一樽又長滿心中萬事如等閑
主人有黍百餘石濁醪數斗應不惜
即今相對不盡歡別後相思復何益
茱萸灣頭歸路賒願君且宿黃翁家
風光若此人不醉參差孤負東園花

題長安主人壁

世人結交須黃金黃金不多交不深
縱令然諾暫相許終是悠悠行路心

王季友

季友詩愛竒務險遠出常情之外然而白
首短褐良可悲夫至如觀于舍人西亭壁
畫山水詩野人宿在人家少朝見此山謂
山曉半壁仍棲嶺上雲開簾放出湖中鳥

甚有新意

雜詩

采山仍采隱在木不在深持斧事遠遊固悲匠
者心翳翳青桐枝樵爨日所侵樵聲出巖壑四
聽無知音豈爲鼎下薪當復堂上琴鳳鳥又不
栖且與枳棘林

代賀枝令譽贈沈千運

相逢問姓名亦存別時無子今有孫山上雙松
長不改百家惟有三家村南村西車馬道一
宿通舟水浩浩間中磊磊十里石可上於足重
桑麥平坡塚墓皆我親滿田主人是舊客舉聲
酸鼻問同年十人七人歸下泉分手如何更此
地迴頭不去淚潸然

觀千舍人壁畫山水

野人宿在山家少朝見此山謂山曉半壁仍棲
嶺上雲開簾放出湖中鳥獨坐長松是阿誰再
三招手起來遲千公大笑向予說小弟丹青能
爾爲

滑中贈崔高士瓊

夫子保藥命外身保无咎日月不能老化腸爲

筋不十年前見君甲子過我壽于何今相逢華
髮在我後近而知其遠少見今白首遙信蓬萊
宮不死世世有玄石采盈檐神方秘其肘問家
惟指雲愛氣常言酒攝生固如此履道當不朽
未能太玄同願亦天地久實腹以芝木賤體仍
芻狗自勉將勉余良藥在苦口

山中贈十四秘書山兄

出山秘芸署山色已再春食我山中藥不憶山
中人山中誰余密白髮日相親雀鼠晝夜無知
我廚廩貧有情盡捐棄土石爲周身衣衣言此
松不厭吾南隣夫子質千尋天澤枝葉新今以
不材壽非智免斧斤

酬李十六岐

鍊丹文武火未成賣藥販履俱逃名出谷迷行
洛陽道乘流醉臥滑臺城城下故人久離怨一
歡適我兩家願朝飲杖懸沽酒錢暮殮囊有松
花撤何車馬日憧憧李膺門館爭登龍干賓揖
對若流水五經發難如扣鍾下筆新詩行滿壁
立談古人坐在席問我草堂有臥雲知我山儲
無儋石自耕自刈食爲天如鹿如麋飲野泉亦

知世上公卿貴且養丘中草木年

陶翰

歷代詞人詩筆雙美者鮮矣今陶生實謂
兼之既多興象復備風骨三百年以前方
可論其體裁也

古塞下曲

進軍飛狐北窮寇勢將變日落塵沙昏背河更
一戰駢馬黃金勒雕弓白羽箭射殺左賢王歸
奏未央殿欲言塞下事天子不召見東出咸陽

門哀哀辰如露

燕歌行

請君留楚調聽我吟燕歌家在遼水頭邊風意
氣多出身爲漢將正值戎未和雪中凌天山水
上度交河大小百餘戰封侯竟蹉跎歸來霸陵
下故舊無相過雄劍委塵匣空門惟雀羅玉簪
還趙妹瑤琴付齊娥昔日不爲樂時哉今奈何

贈鄭貞外

駢馬拂繡裳按兵遼水陽西分雁門騎北逐樓
煩王聞道五軍集相邀百戰場風沙暗天起虜
陣森已行儒服揖諸將雄謀吞八荒金門來見

謁朱紱生輝光數載侍御史稍遷尚書郎人生
志氣立所貴功業昌何必守章句終年事蒼黃
同時獻賦客尚在東陵傍

望太華贈盧司食

作吏到西華乃觀三峰壯削成元氣中傑出天
河上如有飛動色不知青冥狀巨靈安在哉厥
迹猶可望方此顧行旅未由飭仙裝葱朧記星
壇明滅數雲障良友垂真契宿心所微尚敢投
歸山吟霞徑一相訪

晚出尹洞守可南長衣

退無宴息資進無當代策冉冉時將暮坐爲周
南客前登聞塞門永眺伊城陌長川黯已暮千
里寒氣白家本渭水西異日何所適秉志師禽
尚微言祖莊易一辭林壑間共繫風塵役才名
忽先進天邑多紛劇豈念嘉遁時依依偶沮溺

贈房侍御

時房公在新安

志人固不羈與道常周旋進則天下仰已之能
晏然褐衣東府召執簡南臺先雄義每特立犯
顏豈圖全謫居東南遠逸氣吟芳荃適會寥廓
趣清波更寅緣扁舟入五湖發纜洞庭前浩蕩

臨海曲迢遙濟江壖徵竒忽忘返遇興將彌年
乃悟范生智足明漁父賢郡臨新安渚佳氣此
城偏日夕對層岫雲霞映晴川閑居戀秋色偃
臥含貞堅荷伏自相化行藏亦推遷君其振羽
翮歲晏將冲天

經殺子谷

扶蘇秦帝子舉代稱其賢百萬猶在握可爭天
下權束身就一劍壯志皆華捐塞下有遺迹千
齡人共傳踈蕪盡荒草寂歷空寒烟到此盡垂
戾非我獨督然

乘潮至漁浦作

檣棹早乘潮潮來如風雨樟臺忽已隱界峰莫
及覩崩騰心爲失浩蕩目無主虜慄浪始聞漾
漾入漁浦雲景共澄霽江山相吞吐偉哉造化
靈此事從終古流沫誠足誠高歌調易苦頗因
忠信全客心猶栩栩

宿天竺寺

松柏亂崑口山西微徑通天開一峰見宮闕生
虛空正殿倚霞壁千樓標石叢夜來猿鳥靜鍾
梵寒雲中岑翠映湖月泉聲亂溪風心超諸境

外了與懸解同明發氣候改起視長岷東湖色
濃蕩滌海光漸腫朦葛仙迹尚在許氏道猶崇
獨往古來事幽懷期二公

早過臨淮

夜來三渚風晨過臨淮島潮中海氣白城上楚
雲早鱗鱗魚浦帆漭漭蘆洲草川路白浩蕩愁
焉心如擣且言任倚伏何暇念枯槁范子名屢
移遽公志常保古人去已久此理今難道

出蕭關懷古

驅馬擊長劍丁役至蕭關文安志五原二水北
前北虜二十萬此中常控弦秦城亘宇宙漢帝
理旄旒刁斗鳴不息羽書日夜傳五軍計莫就
三策議空全大漠橫萬里蕭條絕人烟孤城當
瀚海落日照祈連愴然苦寒奏懷哉式微篇更
悲秦樓月夜夜出胡天

李頎

頎詩發調旣清修辭亦綉雜歌咸善玄理
最長至如送暨道士云大道本無我青春
長與君又聽彈胡笳聲云幽音變調忽飄
洒長風吹林雨墮瓦迸泉颯颯飛木末野

鹿呦呦走堂下足可歔歔震蕩心神惜其
偉才只到黃綬故論其數家往往高於衆作

謁張果老先生

先生谷神者甲子焉能計自說軒轅師于今數
千歲寓遊城郭裏浪迹希夷際應物雲無心逢
時舟不繫霞食斷火粒野服兼荷製白雪淨肌
膚青松養身世韜精殊豹隱鍊質同蟬蛻忽去
不知誰偶來寧有契二儀齊壽考六合隨休憩
彭聃猶嬰孩松期且微細嘗聞穆天子更憶漢
皇帝親屈萬乘尊行宮四海齊更走靈芝
帛招談說八駿空往來三山轉虧蔽吾君感至
德玄老欣來詣受籙金殿開清齋玉堂閉笙歌
迎拜首羽帳崇嚴衛禁柳垂香爐宮花拂仙袂
祈年寶祈廣致福蒼生惠何必待龍髯鼎成方
取濟

送暨道士還玉清觀

仙官有名籍度世吳江濱大道本無我青春長
與君中洲俄已到至理得而聞明主降黃屋時
人看白雲空山何窈窕巨秀日氛氲此道留書
客超遙烟駕分

東郊寄萬楚

濩落久無用，隱身甘採薇。仍聞薄宦者，還事田
家衣。潁水日夜流，故人相見稀。春山不可望，黃
鳥東南飛。濯足豈長往，一樽聊可依。了然潭上
月，適我胃中機。在昔同門友，如今出處非。優游
白虎殿，偃息青瑣闈。且有薦君表，當看携手歸。
寄書不代面，蘭芷空芳菲。

登首陽山謁夷齊廟

古人已不見，喬木竟誰過。寂寞首陽山，白雲空
夏多蒼苔，歸地骨。浩首採薇歌，畢命無怨嗟。
仁其若何我來入遺廟，時候微清和。落日吊山
霓迴風吹女蘿，石崖向西豁引領望黃河千里
一飛鳥孤光東逝波，駢車層城路惆悵此巖阿

題綦毋潛書所居

常稱挂冠吏，昨日歸滄洲。行客暮帆遠，主人庭
樹秋。豈伊得天命，但欲爲山遊。萬物我何有，白
雲空自幽。蕭條江海上市日夕是丹丘，生事本魚
鳥賞心隨去留。惜哉曠微月，欲濟無輕舟。倏忽
令人老，相思河水流。

漁父歌

白頭何老人蓑笠蔽其身避世常不仕釣魚清
江濱浦沙明濯足山月靜垂綸寓宿湍與瀨行
歌秋復春持撓湘岼竹蕪火蘆洲新綠水飯香
稻青荷包紫鱗於中還自樂所欲全吾真而笑
獨醒者臨流多苦辛

古意

男兒事長征生小幽燕客賭勝馬蹄下由來輕
七尺殺人莫敢前髮如蝟毛磔黃雲白雪隴底
飛未得報恩不得歸遼東小婦年十五慣彈琵琶
解歌舞今爲羌笛出塞聲使我三軍戾口百

送康洽入京進樂府詩

識子十年何不遇只愛歡遊兩京路朝吟左氏
媧女篇夜誦相如美人賦長安春物舊相宜小
苑蒲萄花滿枝柳色偏濃九華殿鶯聲醉殺五
陵兒曳裾此夜從何所中貴由來盡相許白袂
春衫仙吏贈烏皮隱几臺郎與新詩樂府唱堪
愁御妓應傳鳩鵲樓西上雖因長公主終須一
見曲陵侯

送陳章甫

四月南風大麥黃棗花未落桐陰長青山朝別

暮還見嘶馬出門思舊鄉陳侯立身何坦蕩虬
鬚虎眉仍大顙腹中著書一萬卷不肯低頭在
草莽東門酤酒飲我曹心輕萬事如鴻毛醉臥
不知白日暮有時空望孤雲高長河浪頭連天
黑津吏停舟渡不得鄭國遊人未及家洛陽行
子空歎息聞道故林相識多罷官昨日今如何
聽董大彈胡笳聲兼語弄寄房給事

蔡女昔造胡笳聲一彈一十有八柏胡人落淚
向邊草漢使斷腸對歸客古戍蒼蒼烽火寒大
荒陰沉飛雪白先拂百弦後角四吹

撼撼董夫子通神明深山竊聽來妖精言遲更
速皆應手將往復旋如有情空山白鳥散還合
萬里浮雲陰且晴嘶酸鷓鴣雁失羣夜斷絕胡兒
戀母聲川爲靜其波鳥亦罷其鳴烏珠部落家
鄉遠邏沙塵哀怨生幽陰變調忽飄洒長風
吹林雨墮瓦迸泉颯颯飛木末野鹿呦呦走堂
下長安城連東掖垣鳳凰池對青瑣門才高脫
略名與利日夕望君抱琴至

緩歌行

小來脫身攀貴遊傾財破產無所憂暮擬經過

石渠署朝將出入銅龍樓結交杜陵輕薄子謂
言可生復可死一沉一浮會有時棄我翻然如
脫屣男兒立身須自強十年閉戶穎水陽業就
功成見明主擊鍾鼎食坐華堂二八蛾眉梳墮
馬美酒清歌曲堂下文昌宮中賜錦衣長安陌
上退朝歸五侯賓從莫敢視三省官僚揖者稀
早知今日讀書是悔作從前狂俠兒

鮫人歌

鮫人潛織水底居側身上下隨龍魚輕綃文采
島青冥無極已泣珠報恩君莫辭今年相見明
年期始知萬族無不有百尺深泉架戶牖鳥沒
空山誰復望一望雲濤堪白首

送盧逸人

洛陽爲此別携手更何時不復人間見祇應海
上期青溪入雲木白首卧茅茨共惜盧敖去天
邊所望思

野老曝背

百歲老翁不種田唯知曝背樂殘年有時捫虱
獨搔首目送歸鴻籬下眠

高適

評事性拓落不拘小節耻預常科隱迹博
徒才名自遠然適詩多習臆語兼有氣骨
故朝野通賞其文至如燕歌行等篇甚有
奇句且余所最深愛者未知肝膽向誰是
令人却憶平原君

哭單父梁九少府

開篋淚沾臆見君前日晝夜臺今寂寞猶是子
雲居疇昔貪靈竒登臨賦山水同舟南楚下望
在萬事皆如此晉山徒嵯峨斯人已冥冥常時
祿且薄沒後家復貧妻子在遠道兄弟無一人
十上多苦辛一官怕自哂青雲將何致白日忽
西盡唯獨身後名空留無遠近

宋中遇陳兼

常參鮑叔義所期王佐才如何守苦節獨自無
良媒離別十年內飄颻千里來安知罷官後唯
見柴門開窮巷隱東郭高堂詠南陔籬根長花
草井口生莓苔伊昔望霄漢于今倦蒿萊男兒
須達命且醉手中杯

宋中

梁苑白日暮梁園秋草時君王不可見修竹令人悲九月桑葉落寒風鳴樹枝

九日酬顧少府

簷前白日應可惜籬下黃花爲誰有客子迎霜未授衣主人得錢肯沽酒蘇秦憔悴時多馱蔡澤栖遲世看醜縱使登高只斷腸不如獨自空搔首

見薛大臂鷹作

寒楚十二月蒼鷹八十毛寄言燕雀莫相啖自

有雲霄萬里高

訓岑主簿秋夜見贈

舍下蛩亂鳴居然自蕭索緬懷高秋興忽枉清夜作感物我心勞涼風生二毛池枯菡萏死月上梧桐高如何異州縣復得交才彥泪沒嗟後時蹉跎耻相見南山別來久魏闕誰不戀獨有江海心悠悠未嘗倦

送韋參軍

二十解書劍西遊長安城舉頭望君門屈指數公卿國風冲融邁三五朝廷歡樂彌寰宇白璧

皆言賜近臣布衣不得干明主歸來洛陽無負
郭東過梁宋非吾土兔苑爲農歲不登雁池垂
釣心常苦世人遇我同衆人唯君於我情相親
且喜百年有交態未曾一日辭家貧彈琴擊筑
白日晚縱酒高歌楊柳春歡娛未盡分散去使
我惆悵驚心神終當不作兒女別臨岐涕淚沾
衣巾

封丘作

我本漁樵孟諸野一生自是悠悠者乍可狂歌
草澤中寧堪作吏風塵下只言小邑無所爲公
門百事皆有期拜迎長官心欲碎鞭撻黎庶令
人悲悲來向家問妻子舉家盡笑今如此生事
應須南畝田世情分付東流水夢想舊山安在
哉爲銜君命日遲迴早知梅福徒爲爾轉憶陶
潛歸去來

邯鄲少年行

邯鄲城南遊俠子自矜生長邯鄲裏千場縱博
家仍富數處報讐身不死宅中歌笑日紛紛門
外車馬屯如雲未知肝膽向誰是令人却憶平
原君君不見即今交態薄黃金用盡還踈索以

茲感嘆辭舊遊更於時事無所求且與少年飲美酒往來射獵西山頭

燕歌行

開元十六年客有從御史張公出塞而還者作燕歌行以示適感征戍之事因而和焉

漢家烟塵在東北漢將辭家破殘賊男兒本自重橫行天子非常借顏色撻金伐鼓下榆關旌旆逶迤碣石間校尉羽書飛瀚海單于獵火照狼山山川蕭條極邊土胡騎憑陵雜風雨戰士

軍前半死生美人帳下猶歌舞大漠窮秋塞草腓孤城落日鬪兵稀身當恩遇常輕敵力盡關山未解圍鐵衣遠戍辛勤久玉筋應啼別離後少婦城南欲斷腸征人薊北空回首邊庭飄颻那可度絕域蒼黃何所有殺氣三時作陣雲寒聲一夜傳刁斗相看白刃血紛紛死節從來豈顧勛君不見沙場征戰苦至今猶憶李將軍作

風邊

行路難

君不見富家翁舊時貧賤誰比數一朝金多結

豪貴百事勝人健如虎子孫生長滿眼前妻能
筦絃妾能舞自矜一朝忽如此却笑傷人獨愁
苦東隣少年安所如席門窮巷出無車有才不
肯學干謁何用年年空讀書

塞上聞笛

胡人羌笛成樓間樓上蕭條明月閑借問梅花
何處落風吹一夜滿關山

營州歌

營州少年馱原野狐裘蒙茸獵城下虜酒千杯
不醉人胡兒十歲能騎馬

河嶽英靈集中

唐丹陽進士殷璠集

岑參

參詩語奇體峻意亦造奇至如長風吹白
茅野火燒枯桑可謂逸才又山風吹空林
颯颯如有人宜稱幽致也

終南雙峯草堂作

歛跡歸山田息心謝時輩晝還草堂卧但與雙
峯對興來恣佳遊事愜符勝槩著書高窓下日
夕見城內曩爲世人誤遂負平生愛久與林壑

辭及來杉松大偶茲近精廬數預名僧會有時
逐漁樵永日不冠帶岨口上新月石門破蒼謁
色向羣木深光搖一潭碎緬懷鄭生谷頗憶嚴
子瀨勝事獨可追斯人邈千載

終南雲際精舍尋法澄上人
不遇歸高冠東潭石淙秦嶺微雨作貽友人

昨夜雲際宿適從西嶺迴不見林中僧微雨潭
上來諸峰皆晴翠秦嶺獨不開石鼓有時鳴秦
王安在哉水激斷山口吼沫相喧逐噴壁四時
雨傷村終日雷北瞻長安道日夕坐塵埃若訪

張仲蔚衡門應蒿萊

戲題關門

來亦一布衣去亦一布衣羞見關城吏還從舊
路歸

觀釣翁

扁舟滄浪叟心與滄浪清不自道鄉里無人知
姓名朝從灘上飯暮向蘆中宿歌竟還復歌手
持一竿竹竿頭釣絲長丈餘鼓棹乘流無定居
世人那得解深意此翁取適非取魚

戎葵花歌

昨日一花開今日一花開今日花正好昨日花
已老始知人老不如花可惜落花君莫掃人生
不得長少年莫惜牀頭沽酒錢有錢向酒家不
見戎葵花

偃師東與韓樽同訪景雲暉上人即事
山陰老僧解楞伽潁陽歸客遠相過烟深草濕
昨夜雨雨後秋風度漕河空山終日塵事少平
郊遠見行人小尚書磧上黃昏鐘別駕渡頭一
歸鳥

春夢

洞房昨夜春風起遙憶美人湘江水枕上片時
春夢中行盡江南數千里

崔顥

顥年少爲詩名陷輕薄晚節忽變常體風
骨凜然一窺塞垣說盡戎旅至如殺人遼
水上走馬漁陽歸錯落金鎖甲蒙茸貂鼠
衣又春風吹淺草獵騎何翩翩插羽兩相
顧鳴弓上新絃可與鮑昭並駢也

贈王威古

三十羽林將出身常事邊春風吹淺草獵騎何

翩翩插羽兩相顧鳴弓上新絃射麋入深谷飲
馬投荒泉馬上共傾酒野中聊割鮮相看未及
飲雜虜寇幽燕烽火去不息胡山高際天長駢
救東北戰解城亦全報國行赴難古來皆共然

古遊俠呈軍中諸將

少年負膽氣好勇復知機杖劍出門去孤城逢
合圍殺人遼水上走馬漁陽歸錯落金鎖甲蒙
茸貂鼠衣還家且行獵弓矢速如飛地迴鷹犬
疾草深狐兔肥腰間帶兩綬轉盼生光輝顧謂
今日戰何如隨建威

送單于裴都護

征馬去翩翩秋城月正圓單于莫近塞都護欲
回邊漢驛通烟火胡沙乏水泉功成須獻捷未
必去經年

江南曲

君家定何處妾住在橫塘停船暫借問或可是
同鄉

贈懷一上人

法師東南秀世實豪家子削髮十二年誦經峨
眉裏自此照羣蒙卓然爲道雄觀生盡歸妄悟

有皆成空洗意無衆染苦心歸妙宗一朝勅書
至召入承明宮說法金殿裏焚香清禁中傳燈
遍都邑杖錫遊王公天子揖妙道群僚趨下風
我本法無着時來出林壑因心得化域隨病皆
與藥上啓黃屋心下除蒼生縛一從入君門說
法無朝昏帝作轉輪主師爲持戒尊軒風洒甘
露佛雨生慈根但有滅度理而無開濟恩復聞
江海曲好殺成風俗帝曰我上人爲除羶腥欲
是日發西秦東南至蘄春風將衡桂接地與吳
楚鄰舊少清信士實多漁獵人一聞吾師至捨

網江湖濱作禮懺前惡潔誠期後因因成日既
久事濟身不守更出淮楚間復來荆河口荆河
馬卿岑茲地近道林入講鳥常狎坐禪獸不侵
都非緣未盡曾是教所任故我一來事永永微
妙音竹房見衣鉢松宇清身心早悔業志淺晚
成計可尋善哉達公義清淨如黃金

定襄陽郡獄

我在河東時使往定襄里定襄諸小兒爭訟紛
城市長老莫敢言太守不能理謗書盈几案文
墨相填委牽引肆中翁追呼田家子我來折此

獄師聽辨疑似小大必以情未嘗施鞭箠是時
三月暮遍野農桑起里巷鳴春鳩田園引流水
此鄉多雜俗戎夏殊音旨顧問邊塞人勞情曷
云已

遼西

燕郊芳歲晚殘雪凍邊城四月青草合遼陽春
水生胡人正牧馬漢將日徵兵露重寶刀濕沙
虛金甲鳴寒衣着已盡春服誰為成寄語洛陽
使為傳邊塞情

孟門行

黃雀銜黃花翩翩傍簷隙本擬報君恩如何返
彈射金壘美酒滿坐春平原愛才多衆賓滿堂
盡是忠義士何意得有詭諛人諛言翻覆那可
道能令君心不自保北園新栽桃李枝根株未
固何轉移成陰結子君自取若問傍人那得知

借一作問

霍將軍篇

長安甲第高入雲誰家居住霍將軍日晚朝迴
擁賓從路傍揖拜何紛紛莫言炙手手可熱須
史火盡灰亦滅莫言貧賤即可欺人生富貴自

有時一朝天子賜顏色世上悠悠應自知

雁門胡人歌

高山代郡接東燕雁門胡人家近邊解放胡鷹
逐塞鳥能將代馬獵秋田山頭野火閑多燒雨
裏孤峰濕作烟聞道遼西無鬪戰時時醉向酒
家眠

黃鶴樓

昔人已乘白雲去此地空餘黃鶴樓黃鶴一去
不復返白雲千載空悠悠晴川歷歷漢陽樹春
草萋萋鸚鵡洲日暮鄉關何處在烟波江上使

人愁

薛據

據爲人骨鯁有氣魄其文亦爾自傷不早
達因著古興詩云投珠恐見疑抱玉但垂
泣道在君不舉功成嘆何及怨憤頗深至
如寒風吹長林白日原上沒又孟冬時短
晷日盡西南天可謂曠代之佳句

古興

日中望仙闕軒蓋揚飛塵鳴珮初罷朝自言皆
近臣光華滿道路意氣安可親歸來宴高堂廣

筵羅八珍僕妾盡綺紈歌舞夜達晨四時固相
代誰能分要津已看覆前車未見易後輪丈夫
須兼濟豈能樂一身君今皆得志肯顧憔悴人
初去郡齋書情
肅徒辭汝穎懷古獨悽然尚想文王化猶思巢
父賢時移多讒巧大道竟誰傳况見疾風起悠
悠旌旆懸征鴻無返翼歸流不停川已經霜雪
下仍驗松柏堅迴首望城邑迢迢間雲烟志士
不傷物小人皆自妍感時惟責已在道非怨天
從此適樂土東歸得幾年

落第後口號

十五能文西入秦三十無家作路人時命不將
明主合布衣空惹洛陽塵

題丹陽陶司馬廳

高鑒清洞徹儒風人進難詔書增寵命才子益
能官門帶山光晚城臨江水寒唯余好文客時
得詠幽蘭

冬夜寓居寄儲太祝

自爲洛陽客夫子吾知音愛義能下士時人無
此心柰何離居夜巢鳥飛空林愁坐至月上復

聞南隣砧

懷哉行

明時無廢人廣廈無棄材良工不我顧有用寧
自媒懷策望君門歲晏空遲迴秦城多車馬日
夕飛塵埃伐鼓千門啓鳴珂雙闕來我聞雷雨
施天澤罔不該何意斯人徒棄之如死灰主好
臣必効時禁權必開俗流實驕矜得志輕草萊
文王賴多士漢帝資羣材一言並拜將片善成
居台夫君何不遇爲泣黃金臺

泊震澤口

日落草木陰舟徙泊江汜蒼茫萬象開合沓聞
風水洄澗值漁翁窸窣逢樵子雲開天宇靜月
明照萬里早雁湖上飛晨鐘海邊起獨坐嗟遠
遊登岼望孤洲零落星欲盡腫脹氣漸收行歲
空自秉智識仍未周伍胥旣伏劍范蠡亦乘流
歌竟鼓楫去三江多客愁

西陵口觀海

長江漫湯湯近海勢彌廣在昔坯混凝融爲百
川決地形失端倪天色混沈養東南際萬里極
目遠無象山影乍浮沉潮波忽來往孤帆或不

見棹歌猶嚮像日暮長風起客心空振蕩浦口
霞未收潭心月初上林嶼幾遭迴亭臯時偃仰
歲晏訪蓬瀛真遊非外獎

登秦望山

南登秦望山目極大海空朝陽半蕩漾晃朗天
水紅溪壑爭噴薄江湖迤交通而多漁商客不
悟歲月窮振縉迎早潮弭棹候遠風予本萍泛
者乘流任西東茫茫天際帆栖泊何時同將尋
會稽迹從此訪任公

出青門往南山下別業

舊居在南山夙駕自城闕榛莽相蔽虧去爾漸
超忽散漫餘雪晴蒼茫季冬月寒風吹長林白
日原上沒懷抱曠莫伸相知阻胡越弱年好棲
隱鍊藥在崑窟及此離垢氛興來亦因物末路
期赤松斯言度不伐

綦毋潛

潛詩屹萃峭舊足佳句善寫方外之情至
如松覆山殿冷不可多得又塔影挂清漢
鐘聲和白雲歷代未有荆南分野數百年
來獨秀斯人

春泛若耶

幽意無斷絕此去隨所偶晚風吹行舟花路入
溪口際夜轉西壑隔山望南斗潭烟飛溶溶林
風低向後生事且瀟漫願爲持竿叟

題招隱寺絢公房

開士度人久空山花霧深徒知燕坐處不見有
爲心蘭若門對壑田家路隔林還言澄法性歸
去比黃金

題鶴林寺

道門隱形勝向背臨層霄松覆山殿冷花藏溪
路遙珊珊寶幡挂熠熠明燈燒遲日半空谷春
風連上潮少憑水木興慙添身心調願謝携手
客茲山禪誦饒

題靈隱寺山頂院

招提此山頂下界不相聞塔影挂清漢鐘聲和
白雲觀空靜室掩行道衆香焚且駐西來駕人
天日未曛

送儲十二還莊城

西坂何繚繞青林問子家天寒噪野雀日晚度
城鴉寂歷道傍樹曛曩原上霞竝情不可說長

恨隱淪賒

若耶溪逢孔九

相逢此溪曲勝託在烟霞潭影竹裏動崑陰簷
際斜人言上皇代犬吠武陵家借問淹留日春
風滿若耶

孟浩然

余嘗謂禰衡不遇趙壹無祿其過在人也
及觀襄陽孟浩然整折謙退才名日高天
下籍臺竟淪落明代終於布衣悲夫浩然
詩文彩芊茸經緯綿密半遵雅調全削凡
體至如衆山遙對酒孤嶼共題詩無論興
象兼復故實又氣蒸雲夢澤波動岳陽城
亦爲高唱

過景空寺故融公蘭若

池上青蓮宇林間白馬泉故人成異物過甜獨
潛然旣禮新墳塔還尋舊石筵平生竹如意猶
挂草堂前

過上人蘭若

山頭禪室挂僧衣窻外無人越鳥飛黃昏半在
下山路却聽松聲聯翠微

裴司戶負司士見荅

府僚能枉駕家醞復新開
落日池上酌清風
松下來廚人具雞黍稚子摘楊梅
誰道山翁醉猶能騎馬回

九日懷襄陽

去國侶如昨倏焉經杪秋
峴山望不見風景令人愁
誰採籬下菊應閑池上樓
宜城多美酒歸與葛強遊

歸故園作

北闕休上書南山歸弊廬
不才明主弃多病故人踈
白髮催年老青陽逼歲除
永懷愁不寐松月夜窓虛

夜歸鹿門歌

山寺鳴鐘晝已昏魚梁渡頭爭渡喧
人隨沙路向江村予亦乘舟歸鹿門
鹿門月照烟中樹忽到龐公棲隱處
嵒扉松徑長寂寥唯有幽人夜來去

崔國輔

國輔詩婉孌清楚深宜諷味樂府數章古人不及也

雜詩

逢着平樂兒論交鞍馬前與酣一斗酒恰用十
千錢後余在關內作事多迍邅何肯相救援徒
聞寶劍篇

石頭瀨作

悵矣秋風時余臨石頭瀨日高見超遠望盡此
州內羽山數點青海岍雜光碎離離樹木少漈
漈波潮大日暮千里帆南飛落天外須臾遂入
夜楚色有微藹尋遠迹已窮遺榮事多昧一身
猶未理安得濟時代且泛朝夕潮荷衣蕙爲帶

魏宮詞

朝日點紅粧擬上銅雀臺畫眉猶未竟魏帝使
人催

怨詞

妾有羅衣裳秦王在時作爲舞春風多秋來不
堪着

少年行

遺却珊瑚鞭白馬驕不行章臺折楊柳春日路
傷情

長信草

長信宮中草年年愁處生時侵珠履跡不使玉
堦行

香風詞

洛陽梨花落如霰河陽桃葉生復齊坐怨玉樓
春欲盡紅綿粉絮裊粧啼

對酒吟

行行日將夕荒村古塚無人迹朦朧荆棘一鳥
吟屢勸提壺酤酒喫古人不達酒不足遺恨精
靈傳此曲寄言世上諸少年平生且盡杯中綠

漂母吟

泗水入淮處南邊古岬存秦時有漂母於此見
王孫王孫初未遇寄食何多論後爲淮陰侯誓
欲荅母恩事迹貴在此空傷千載魂茫茫水中
渚上有一孤塚遙望不可到蒼蒼霧樹昏幾年
崩塚色暮日落波痕古地多陁阨時哉不敢言
向夕淚沾裳只宿蘆洲村

湖南曲

湖南送君去湖北送君歸湖裏鴛鴦鳥雙雙他
自飛

秦中感興寄遠上人

一丘常欲卧三徑苦無資北上非吾願東林懷
我師黃金燃桂盡壯志逐年衰日夕涼風至
蟬但益悲

夜度湘江

客行貪利涉夜裏渡湘川露氣聞芳杜歌聲識
採蓮榜人投岼火漁子宿潭烟行侶遥相問泔
陽何處邊

渡浙江問舟中人

潮落江平未有風扁舟共濟與君同時時引領
望天末何處青山是越中

儲光義

儲公詩格高調逸趣遠情深削盡常言挾
風雅之迹浩然之氣述華清宮詩云山開
鴻濛色天轉招搖星又遊茅山詩云小門
入松柏天路涵虛空此例數百句已略見
荆揚集不復廣引璠嘗觀公正論十五卷
九經外義疏二十卷言博理當實可謂經
國之大才

雜詩二章

秋氣肅天地太行高崔嵬猿狖清夜吟其聲一

何來寂寞掩圭華夢寐遊蓬萊琪樹遠亭亭玉
堂雲中開洪崖吹簫莞素女飄飄來雨師既先
後道路無纖埃鄙哉楚襄王獨如雲陽臺

其二

渾胚本無象末路多是非達士志寒廓所在能
忘機耕鑿時未至還山聊採薇虎豹對我蹲鸞
鴛傷我飛仙人空中來謂我勿復歸格擇爲君
駕雲霓爲君衣西近崑崙墟可與世人違

効古二章

晨登涼風臺暮走邯鄲道曜靈何赫烈四野無
青草大軍北集燕天子西居鎬婦人役州縣丁
男事征討老幼相別離泣哭無昏早稼穡旣殄
絕川澤復枯槁曠哉遠此憂冥冥商山皓

其二

東風吹大河河水如倒流河洲塵沙起有若黃
雲浮頽霞燒廣澤洪曜赫高丘野老泣相逢無
地可蔭休翰林有客卿獨負蒼生憂中夜起躑
躅思欲獻厥謀君門峻且深跣足空夷猶

猛虎詞

寒亦不憂雪飢亦不食人人肉豈不甘所惡傷

明神太室爲我宅孟門爲我鄰百獸爲我膳五
龍爲我賓羃馬一何威浮江亦以仁綵章耀朝
日牙爪雄武臣高雲逐氣浮厚地隨聲震君能
賈餘勇日夕長相親

射雉詞

曝暄理新翳迎春射鳴雉原田遙一色臯陸曠
千里遠聞咿啞聲時見雙飛起蒙塵踈高下毳
毳深麥裏顧敵仍忘生爭雄方決死仁心貴勇
義豈復能傷此超遙下故墟迢迢回高軌丈夫
昔何苦取笑歡妻子

採蓮詞

淺渚荇花繁深塘芰葉踈獨往方自得耻邀淇
上姝廣江無術阡大澤絕方隅浪中海童語林
下鮫人居春雁時隱舟新萍復滿湖采采乘日
暮不思賢與愚

牧童詞

不言牧田遠不道牧陂深所念牛馴擾不亂牧
童心圓笠覆我首長蓑披我襟方將憂暑雨亦
以惧寒陰大牛隱層坂小牛穿近林同顏相鼓
舞觸物成謳吟取樂須臾間寧問聲與音

田家事

蒲葉日已長杏花日已滋老農要看此貴不違
天時迎晨起飯牛雙駕耕東菑蚯蚓土中出田
鳥隨我飛羣合亂啄噪嗷嗷如道飢我心多惻
隱顧此兩傷悲撥食與田鳥日暮空筐歸親戚
更相笑我心終不移

寄孫山人

新林二月孤舟還水滿清江花滿山借問故園
隱君子時時來去在人間

訓綦母校書夢遊耶溪見贈之作

校文在仙掖每有滄洲心况以北窓下夢遊清
溪陰春看湖口漫夜入迴塘深往往纜垂葛出
舟望前林山人松下飯釣客蘆中吟水隱何足
貴勝遊在幽尋歷茲山水間冷然若鳴琴申章
謝來意愧莫訓知音

使過彈箏峽作

鳥雀知天雪羣飛復羣鳴原田無遺粟日暮滿
空城達士憂世務鄙夫念王程晨過彈箏峽馬
足凌兢行雙壁隱靈曜莫能知晦明皚皚堅冰
白漫漫陰雲平始信故人言苦節不可貞

王昌齡

昌齡以還四百年內曹劉陸謝風骨頓盡
頃有太原王昌齡魯國儲光義頗從厥遊
且兩賢氣同體別而王稍聲峻至如明堂
坐天子月朔朝諸侯清樂動千門皇風被
九州慶雲從東來決泮抱日流又雲起太
華山雲山相明滅東峰始含景了了見松
雪又楮栴無冬春柯葉連峰稠陰壁下蒼
黑烟含清江樓疊沙積爲崗崩剝雨露幽
石脉盡橫巨替潭何時流又京門望西岳

百里見郊樹飛雨祠上來靄然關中暮又
奸雄乃得志遂使羣心搖赤風蕩中原烈
火無遺巢一人計不用萬里空蕭條又百
泉勢相蕩巨石皆却立昏爲鮫龍窟時見
雲雨入又去時二十萬獨自還長安不信
沙場苦君看刀箭瘢又蘆荻寒蒼江石頭
岸邊飲又長亭酒未醒千里風動地天伏
森森練雪擬身騎駿馬白鷹臂斯並驚耳
駭目今略舉其數十句則中興高作可知
矣余常觀王公長平伏冤又吊枳道賦仁

有餘也柰何晚節不矜細行謫議沸騰垂
歷遐荒使知音者嘆惜

詠史

荷畚至洛陽杖策遊北門天下盡兵甲豺狼滿
中原明夷方遘患顧我徒崩奔自慚菲薄才誤
蒙國士恩位重任亦重時危志彌敦西北未及
終東南不可吞進則耻保躬退乃爲觸藩嘆惜
嵩山老而後知其尊

觀江淮名山圖

刻意吟雲山尤愛丹青妙稜層列林巒微茫出
海嶠而我高其人揮毫發幽眇持此尺寸圖益
展千里眺淡掃霏素烟濃抹映殘照方溯江漢
流忽見淮海徼湘纍謾興哀英皇復誰吊遐蹤
既云滅獨往豈殊調感對懷拂衣胡寧事漁釣
安期始遺舄千古謝榮曜投迹庶可齊滄浪有
孤棹

香積寺禮拜萬廻平等二聖僧塔

眞無御北來昔有乘花歸如彼雙塔內孰能知
是非愚也駭蒼生聖哉爲帝師當爲時世出不
由天地資萬廻至此方平等性無違今我一禮

心億劫同不移肅肅松柏下諸天來有時

齋心

女蘿覆石壁溪水幽蒙籠紫葛蔓黃花娟娟寒
露中朝飲花上露夜臥松下風雲英化爲水光
彩與我同日月蕩精魄寥寥天府空

緱氏尉沈興宋置酒南溪留贈

林色與溪古深篁引幽翠山樽在漁舟棹月情
已醉如窮清源口壑絕人境異春泉滴空岬萌
草圻陰地久之風榛寂遠聞樵聲至海雁時獨
飛永然滄州意古時青冥客滅迹論一尉吾子
躑躅心豈其紛埃事緱岑信所剋濟北余乃遂
齊物意已會息肩理猶未卷舒形性表脫畧賢
哲議乘月期角巾飯僧嵩陽寺

江山聞笛

橫笛怨江月扁舟何處尋聲長楚山外曲遶胡
關深相去萬餘里遙傳此夜心寥寥浦溆寒響
盡惟幽林不知誰家子復奏邯鄲音水客皆擁
棹空霜遂盈襟羸馬望北走遷人悲越吟何當
邊草白旌節隴城陰

東京府縣諸公與綦毋潛李頎相送至

白馬寺宿

鞍馬上東門徘徊入孤舟賢豪相追送即棹千里流赤峰落日在空波微烟收宦薄忘機拈醉來却淹留月明見古寺林木登高樓南風開長廓夏夜如涼秋江月照吳縣西歸夢中遊

趙十四見尋

客來舒長簾開閣延涼風但見無絃琴共君盡樽中晚來常讀易頃者欲還嵩世事何須道黃精且養蒙嵇康殊寡識張翰獨知終忽憶鱸魚膾扁舟往江東

少年行

西陵俠少年客過短長亭青槐夾兩路白馬如流星聞有羽書急單于寇井陘氣高輕赴難誰顧燕山銘

聽人流水調子

孤舟微月對楓林分付鳴箏與客心嶺色千重萬重雨斷絃收與淚痕深

長歌行

曠野饒悲風颼颼黃蒿草繫馬倚白楊誰知我懷抱所是同懷者相逢盡衰老况登漢家陵南

望長安道下有枯樹根上有鼯鼠窠高皇子孫
盡千歲無人過寶玉頰發掘精靈其柰何人生
須達命有酒且長歌

城傍曲

秋風鳴桑條草白狐兔驕邯鄲飯來酒未消城
北原平掣皂鷗射殺空管兩騰虎迴身却月佩
弓弰

塞下曲

飲馬度秋水水寒風似刀平沙日未沒黯黯見
臨洮當昔長城戰咸言意氣高黃塵是今古白

骨亂蓬蒿

長信宮

奉帚平明秋殿開
整將團扇共徘徊
玉顏不及寒鴉色
猶帶昭陽日影來

鄭縣陶大公館中贈馮六元二

儒有輕王侯脫略當世務
本家藍溪下非爲漁
弋故無才困躬耕且欲馳
永路幽居與君近出
谷同所鶩昨日辭石門
五年變秋露雲龍未相
感干謁亦已屢子爲黃綬
羈余忝蓬山顧京門
望西岳百里見郊樹飛雨
祠上來靄然關中暮

驅車鄭城宿秉燭論往素山月出華陰開此河
渚霧清光比故人豁達展心悟馮公尚戢翼元
子仍跼步拂衣易爲高論迹難有趣張范善終
始吾等豈不慕罷酒當涼風屈伸備冥數

從軍行

烽火城西百尺樓黃昏獨坐海風秋更吹橫笛
關山月無那金閨萬里愁

賀蘭進明

貞外好古博達經藉滿腹其所著述一百
餘篇頗究天人之際又有古詩八十首大

體符于阮公又行路難五首並多新興

古意二章

秦庭初指鹿羣盜滿山東忤意皆誅死所言誰
肯忠武關猶未啓兵入望夷宮爲祟非涇水人
君道自窮

其二

崇蘭生澗底香氣滿幽林采采欲爲贈何人是
同心日暮徒盈抱徘徊幽思深慨然紉雜佩重

奏丘中琴一作盈把

行路難五首

君不見崑下井百尺不及泉君不見山上苗數
寸凌雲烟人生相命亦如此何苦太息自憂煎
但願親友長含笑相逢莫乏杖頭錢寒夜邀歡
須秉燭豈不長思花柳年

其二

君不見門中柳榮曜暫時蕭索久君不見陌上
花狂風吹去落誰家隣家思婦見之嘆蓬首不
梳心歷亂盛年夫婿長別離歲暮相逢色凋換

其三

君不見芳樹枝春花落盡蜂不窺君不見梁上

泥秋風始高燕不棲蕩子從軍事征戰蛾眉嬾
娟守空閨獨宿自然堪下淚况復時聞烏夜啼

其四

君不見雲中月斬_日盈還復缺君不見林下風聲
遠意難窮親故平生或聚散歡娛未盡樽酒空
歎息青青陵上柏歲寒能有幾人同

其五

君不見東流水一去無窮已君不見西郊雲日
夕空氣氳羣雁徘徊不能去一雁驚鳴復失羣
人生結交在終始莫以升沉中路分

河嶽英靈集中

河嶽英靈集下

崔署

唐丹陽進士殷璠集

署詩多歎詞要妙清意悲涼送別登樓俱
堪淚下

宿大通和尚塔敬贈如閣梨廣心長孫
錡二山人

支公已寂滅塔影山上古更有真僧來道場救
諸苦一承微妙法寓宿清淨土身心能自親色
相了無取森森松映月漠漠雲近戶雲外飛電

明夜來前山雨然燈見棲鷓作禮聞信鼓晚霽
南軒開秋華淨天宇願言長出世謝爾及申甫
穎陽東溪懷古

靈溪氛霧歇皎鏡清心顏空色不映水秋聲多
在山世人久踈曠萬物皆自閑白鷺寒更浴孤
雲晴未還昔時讓王者此地閉玄關無以躡高
步淒涼岑壑間

途中晚發

晚霽長風裏勞歌赴遠期雲輕歸海疾月滿下
山遲旅望因高盡鄉心遇物悲故林透不見還

在落花時

送薛據之宋州

無媒嗟失路有道亦乘流客處不堪別異鄉應
共愁我生早孤賤淪落居此州風土至今憶山
河皆昔遊一從文章士兩京春復秋君去問相
識幾人今白頭

早發交岬山還太室作

東林氣微白寒鳥急高翔吾亦自茲去北山歸
草堂杪冬正三五日月遙相望肅肅過穎上隴
隴辨少陽川水生積雪野火出枯桑獨往路難

盡窮陰人易傷傷此無衣客如何蒙雨霜

登水門樓見亡友張真期題望黃河作
因以感興

吾友東南美昔聞登此樓人隨川上去書在壁
中留巖子好真隱謝公耽遠遊清風初作頌暇
日復消憂時與交友古跡隨山水幽已孤蒼生
望坐見黃河流流落年將晚悲涼物已秋天高
不可問掩泣赴行舟

王灣

灣詞翰早著爲天下所稱最者不過一二

遊吳中作江南意詩云海日生殘夜江春
入舊年詩人已來少有此句張燕公手題
政事堂每示能文令爲楷式又搗衣篇云
月華照杵空隨妾風響傳砧不到君所有
衆製咸類若斯非張蔡之未曾見也覺顏
謝之彌遠乎

晚春詣蘇州敬贈武負外

蘇臺憶季常飛棹歷江鄉持此功曹掾幼稱華
省郎貴門生禮樂明代秉文章嘉郡位先進洪
儒名重揚爰從姻婭貶豈失忠信防萬里汗馬

足十年睽鳳翔迴遷翼元聖入拜佇惟良別業
對南浦羣書滿北堂意深投客盛才重接筵光
陋學叨鈇簡弱齡詞翰場神馳勞舊國顏展利
殊方際晚雜氛散殘春衆物芳烟和踈樹滿雨
續小江長旅拙感成慰通賢顧不忘從來琴曲
罷開匣爲君張

哭補闕亡友綦母學士

明代資多士儒林得異材書從金殿出人向玉
墀來詞學張平子風儀褚彥回崇儀希上德近
侍接元台曩契心期早今遊宴賞陪屢遷君擢

桂分尉我從梅忽遇乘輶客云傾構厦材泣爲
洹水化嘆作太山頽異善初將尉尋言半始猜
位聯情易感交密痛難裁遠日寒旌暗長風古
挽哀寰中無舊業行處有新苔反哭魂猶寄終
喪子尚孩葬田門吏給墳木路人栽遽洩悲成
往俄傳寵令迴玄經貽石室朱紱耀泉臺地古
春長閉天明夜不開登山一臨哭揮淚滿蒿萊
晚夏馬嵬卿叔池亭即事寄京都一二

知已

忝職畿甸淹濫陪時俊後才輕策疲劣勢薄常

駢走牽役勞風塵秉心在崑數宗賢開別業形
勝代希偶竹繞清渭涓泉流白渠口遠巡期賞
會揮忽變星斗逮此乘務閑因而訪幽叟入來
殊景物行得洗紛垢林靜秋色多潭深月光厚
盛香蓮近坼新味瓜初剖滯拙懷隱論書之寄
良友

奉使登終南山

常愛南山遊因而盡原隰數朝至林嶺百仞登
嵬岌石狀馬經窮苔色步緣入物竒春貌改氣
遠天香集虛洞策杖鳴低雲拂衣濕倚崑見廬

舍人戶欣拜揖問姓矜勤勞示心教澹習玉英
時共飯芝草爲余拾境絕人不行潭深鳥空立
一乘從此授九轉兼是給辭處若輕飛憇來唯
吐吸閑襟超已勝迴路倏而及烟色松上深水
流山下急漸平逢車騎向晚睨城邑峰在野趣
繁塵飄窻情濕辛苦久爲吏榮進何妄執日暮
懷此山悠然賦斯什

奉同賀監林月清酌

華月當秋滿朝軒假興同淨林新霽入規院小
涼通碎影行筵裏揺花落酒中清宵照然意併

此助文雄

江南意

南國多新意東行伺早天潮平兩岬失風正一
帆懸海日生殘夜江春入舊年從來觀氣象惟
向此中偏

觀插箏

虛室有秦箏箏新月復清絃多弄委曲柱促語
分明曉怨凝繁手春嬌入慢聲近來惟此樂傳
得美人情

閏月七日織女

耿耿曙河微神仙此夜稀今年七月閏應得兩
廻歸

祖詠

詠詩剪刻省靜用思尤苦氣雖不高調頗
凌俗至如霽日園林好清明烟火新亦可
稱爲才子也

古意二首

楚王竟何去獨自留巫山偏使世人見迢迢江
水間駐舟春潭裏誓願拜靈顏夢寐覩神女金
沙鳴珮環閑艷絕世姿令人氣力微含笑默不

語化作朝雲飛

其二

夫差日淫放舉國求妃嬪自謂得王寵代間無
美人碧羅象天閣坐輦乘芳春宮女數千騎常
遊江水濱年深玉顏老時薄花粧新拭淚下金
殿嬌多不顧身生前妬歌舞死後同灰塵塚墓
令人哀哀於銅雀臺

遊蘇氏別業

別業本幽處到來生隱心南山當戶牖澧水映
園林竹覆經冬雪庭昏未夕陰寥寥人境外閑

坐聽春禽

清明宴司勳劉郎中別業

田家復近臣行樂不違親霽日園林好清明烟
火新以文常會友唯德自成鄰池照窻陰晚杯
香藥味春簷前花覆地竹外鳥窺人何必桃源
裏深居作隱淪

宿陳留李少府廳作

相知有叔卿訟簡夜彌清旅泊倦愁臥空堂聞
曙更風簾搖燭影秋雨帶虫聲歸思那堪說悠
悠恨洛城

終南望餘雪作

終南陰嶺秀積雪浮雲端林表明霽色城中增暮寒

盧象

象雅而平素有大體得國士之風曩在校書名充秘閣其靈越山最秀新安江甚清盡東南之數郡

家叔徵君東溪草堂二首

開山十餘里青壁森相倚欲識堯時天東溪白雲是雷聲轉幽壑雲氣香流水澗影生垂蛇蟲端翳檉梓大道終不易君恩曷能已鶴羨無老時龜言攝生理浮年笑六甲元化潛一指未暇掃雲梯空慙阮家子

其二

今朝共遊者得性閑未歸已到仙人家莫驚鷗鳥飛水深巖子釣松挂巢父衣雲氣轉幽寂溪流無是非名理未足羨腥臊詎所稀自惟負貞意何歲當食薇

送綦毋潛

夫君不得意本自滄海來高足未云騁虛舟空

復迴淮南楓葉落灞岸桃花開出處暫爲間沉
浮安系哉如何天覆物還遣世遺才欲識秦將
漢嘗聞王與裴離筵對寒食別雨乘春雷曾有
辟書至荷衣莫漫裁

送祖詠

田家宜伏臘歲晏子言歸石路雪初下荒村雞
共飛東原多烟火北澗隱寒輝滿酌野人酒倦
聞隣女機胡爲因樵採幾日罷朝衣

贈程秘書

客自岐陽來吐音若鳴鳳孤飛畏不偶獨立誰

見用忽從披褐中召入承明官聖人借顏色言
事無不通慙勤拯黎庶感激論諸公將相猜賈
誼圖書歸馬融顧今又寂寞一歲麒麟閣且共
歌太平勿嗟名宦薄

贈張均負外

公門世業昌才子冠裴王出自平津邸還爲吏
部郎神仙餘氣色列宿助輝光夜在南宮靜朝
移北禁長時人窺冰鏡明主賜衣裳翰苑飛鸚
鷗天池侍鳳凰承欣儔日顧承紀後時傷去去
圖南遠微才幸不忘

未紀一作未記

追涼歷下古城西北隅此地有清泉喬

木

謝朓出華省王祥貽佩刀前賢真可慕衰疾意
空勞貞悔不自卜遊隨共爾曹未能齊得喪時
復誦離騷閑陰七賢地醉食三士桃蒼苔虞舜
井喬木古城壕漁父偏相狎堯年不可逃蟬鳴
秋雨霽雲白曉山高咫尺傳雙鯉吹噓勿一毛
故人皆得路誰肯念同袍

李嶷

嶷詩鮮淨有規矩其少年行三首詞雖不

多翩翩然佚氣在目也

林園秋夜作

林臥避殘暑白雲長在天賞心旣如醉對酒非
徒然月色徧秋露竹聲兼夜泉涼風懷袖裏茲
意與誰傳

淮南秋夜呈同僚

天淨河漢高夜閑砧杵發清秋忽如此離恨應
難歇風亂池上萍露光竹間月與君共遊處勿
作他鄉別

少年行三首

十八羽林郎戎衣侍漢王臂鷹金殿側挾彈玉
輿傍馳道春風起陪遊出建章

其二

侍獵長楊下承恩更射飛塵生馬影滅箭落雁
行稀薄霧隨天仗聯翩入瑣闈

其三

玉劍膝邊橫金杯馬上傾朝遊茂陵道夜宿鳳
凰城豪吏多猜忌母勞問姓名

閩防

防爲人好名博雅其警策語多真素至如

荒庭何所有老樹半空腹又能挂庭中樹
龍蒸棟裏雲皎然可信也

晚秋石門禮拜

輕策凌絕壁招提謁金仙舟車無遊徑嵯嶠乃
屬天躑躅淹吳景夷猶望新絃石門變暝色谷
口生人烟陽雁叫平楚秋風急寒川馳暉苦代
謝浮脆暫貞堅永欲臥丘壑息心依梵筵誓將
歷劫願無以物外牽

宿岬道人精舍

早歲參道風放情已寥廓重經因息侶遂果嵩

中諾歛迹辭人間
社門守寂寞
秋風剪蘭蕙
霜氣冷淙壑
山牖見然燈
竹房聞搗藥
願言捨塵事
所趣非龍蠖

夕次鹿門山作

龐公嘉遁所
浪迹難追攀
浮舟暝始至
抱杖聊自閑
雙闕開鹿門
白谷集珠灣
噴薄湍上水
春容漂裏山
進原不足險
梁壑未成艱
我行自中春
仲夏鳥綿蠻
蕙草色已晚
客心殊未還
遠遊非避地
訪道愛童顏
安能絢機巧
爭奪錐刀間

百丈溪新理茅茨讀書

浪迹棄人世
還山自幽獨
始傷巢由蹤
吾其獲心曲
荒庭何所有
老樹半空腹
秋蜩鳴北林
暮鳥穿我屋
栖遲樂溘恬
曠寡所欲開
卦推盈虛散
帙改節目
養閑度人事
達命知止足
不學東國儒
俟時勞代輻

與永樂諸公泛黃河作

烟深載酒入
但覺暮川虛
映水見山火
鳴榔聞夜漁
愛茲山水趣
忽與人世踈
無暇燃官燭
中流有望舒

十七行 羣作君

四葉五行 鞍毛作鞭

七行 墨毛作黑

十行 寅俱作黃

五葉六行 條支何作滌戈

九行 然何皆作燃

十一行 桑何作樹

六葉五行 蕭何作瀟

十一行 相何作方

十六行 鳥毛作鳥

七葉一行 匪人何作匪親

十行 滄何作蒼

十三行 嶽毛作岳

十七行 日俱作月

十九行 殷毛作隱

八葉一行 旬俱作鞫

二行 風何作鳳

四行 恍何作恍兮作而

七行 暫樂酒色彫朱顏何作使我不得開心顏

十二行 與君

一遇何作就中與遇

十八行 摧俱作催

九葉一行 度何作家

三行 京何作涼

七行 嬋娟上何疊翠娥二

字 歡何作行

十一行 恨別何作別恨

十六行 昔何

作舊

十七行 苟何作固

十八行 魚何作鱗

十葉二行 几何作机

三行 罷何作飽

八行 童何作兒

九行 嬉

何作歡

十一行 遠何作長

十六行 才何作材

十九行 鼎

毛作鼓

十一葉一行 日俱作時謹何作歡

二行 且毛作更何作徑酤俱作

沽

三行 爾毛作汝

九行 壁毛作璧

十八行 效何作効

二十行 耽嗜俱作頗耽

十二葉十三行 無何作滯

十九行 淑俱作鑑

十三葉三行 思逢何作早蒙

五行 安俱作老

十四葉三行 毛本無吟字

十一行 濟何作齊按唐有齊州無濟州

十六行 來俱作未

十五葉三行 者下何有十字宛作婉

十五行 古何作石里作丈

十六葉五行 慇懃毛作殷勤

十行 德俱作往何注

十七葉十四行 路俱作迹

十八葉七八行 謂毛皆作涓

十九葉一行 鼃何作龜 四行 樓下何有懷歸作三字 六行 十毛

作千

二十葉三行 毛本無安字

二十一葉五行 野人宿在山家少山俱作人 十五行 玄何作虛

十八行 芸俱作雲色毛作水何作木食毛作淪

二十二葉十七行 塵沙何作沙塵

二十三葉四行 竟毛作意 十四行 食俱作倉

二十四葉一行 將何作歲 四行 尙何作回 十三行 戀何作變

十四行 荷毛作倚 二十行 盡俱作空

二十五葉二行 臺何作亭 四行 吞何作含 十二行 臃朦何作瞳

嚟 十五行 來何作得 十六行 潏潏何作莽莽白毛作日愁

作怒 十八行 此理今難道毛作此理難口道何作此理難復

道

二十六葉四行 祈何作祁 十二行 故論其數家俱作故其論家

十五行 浪迹何作放浪 十六行 雪俱作雲

二十七葉一行 感何作咸 四行 祈俱作祚 八行 中何作十 九

行 巨毛作口何作三此道二字作墨釘 十三行 穎何作穎

十八行 登何作發 十九行 古何作故

二十八葉一行 若毛作善 二行 霓俱作鬼石崖俱作石門向毛作

止何作正 四行 潛毛作校何作毋潛校書

三十葉二行 復旋毛作旋復 十六行 捐何作接稀毛作希

三十一葉 野老曝背一首後毛本空一行題河嶽英靈集上高適起

另葉題河嶽英靈集下 十二行 評事何本作適口 五行 何

本無最深二字 六行 君下何有吟諷不厭矣五字

三十二葉三行 苦辛毛作辛苦

三十三葉十四行 琴何作基

三十四葉三行 分付何作付與 六行 行何作遊 七行 裏毛作里

十一行 感嘆何作嘆息 十四行 十六何作二十六從御史

張公出塞何作從元戎出塞 十八行 借毛作惜何作賜

三十五葉五行 蒼黃何作蒼茫何所作無所 十九行 厭下毛注一作

愛 杯毛作鍾 二十行 上卷終三字毛本無以下逕接岑參詩

二十六葉四行 造奇何作奇造 五行 才何作矣 九行 恣何作資

十二行 漁樵何作樵漁永作盡 十四行 獨何作猶

三十七葉八行 棹毛作柁 十行 戎何作戎 十五行 樽何作樽

何本上卷終岑參崔顥起為下卷

三十八葉四行 年少何作少年詩下有屬意浮豔四字名作多 八

行 上新何作新上昭下有江淹二字 十一行 上新絃何作新

上弦 十六行 杖何作杖 十八行 且行俱作行且

三十九葉三行 回俱作臨

四十葉四行 永永毛作永口 六行 達毛作遠 七行 定襄陽郡獄

何作結定襄獄效陶體 十一行 師何作五下注師一作 十三

行 殊毛作多邊塞作塞邊 十八行 誰為毛作為誰

四十一葉一行 本毛作未 五行 若下何注一作 九行 可何作不

十一行 上何作事注一作 自下注始一作 十三行 接東俱作

東接 十四行 閑俱作寒雨毛本注霧一作 何作霧 十五行 遼

下毛注一作 鬪戰毛作戰鬪 十八行 此下毛注一作 餘何作

遺毛注留一作 樹下毛注一作 二十行 萋萋毛注一作

青 在毛作是下注一作

四十二葉六行 短晷何作晷短 七行 句下何有也字 九行 揚飛

毛作飛揚珮何作佩 十一行 綺紈何作紈綺固作自 十三

行 能何作得 十四行 情何作懷

四十三葉三行 塵下何本注一本作 五行 高鑒清洞澈儒風人

進九字何皆作墨釘 九行 義毛作我 十六行 澤何作口

十七行 効何作效 俗流毛作流俗 十八行 成俱作咸

四十四葉五行 識何作誠 八行 長俱作浙坏何作胚 九行 泱俱

作長滉洗俱作潛滉 十五行 漾毛作浴何作谷 十六行 遞

毛作適

四十五葉十六行 燕何作宴

四十六葉十八行 罄何作聲 十九行 臺應作甚

四十七葉三行 唱下何本尙有二十三字云建德江宿云移舟泊煙

渚日暮客愁新野曠天低樹江清月近人 八行 過下應有融

字 九行 越下何本注 一作 十一行 何本無戶員司三字

永嘉上浦館逢張子容 何本過融上人 蘭若下有此詩

逆旅相逢處江村日暮時衆山遙對酒孤嶼共題詩解字隣鮫室

人煙接島夷鄉關萬餘里失路一相悲

四十八葉十行 不及也何作不能過也 十三行 何肯相救援何作

何處肯相救 十七行 數作口

五十葉一行 見俱作饋 二行 後爲淮陰侯誓欲答母恩俱作後爲

楚王來黃金答母恩 三行 茫茫水中渚俱作前臨雙小渚

四行 遙望不可到毛作遙望淮陰口何本遙作口霧樹昏毛作

煙霧昏 五行 暮俱作每波俱作潮

五十一葉三行 迹俱作道浩上有得字 四行 小俱作山 六行 覩

下何空一字 七行 外何作分下注 外一作 十二行 先俱作洗

十七行 格擇何作絡繹 十九行 効俱作效 二十行 暮俱

五十二葉五行 塵沙毛作沙塵 十二行 冪俱作象 十六行 原何

作厚 十七行 蒙俱作冪穉穉何作陪總

五十三葉三行 林俱作淚 四行 萍俱作荷 五行 暮何作養 七

行 陂俱作波 八行 顏毛作類 十三行 蚓俱作蟻出毛作少

十四行 合何作鵠惻作側

五十四葉三四五行

水隱何足貴勝遊在幽尋歷茲山水間冷然若

鳴琴申章謝來意愧莫誦知音俱作小隱何足貴長年固可尋

還車首東道惠然若南金以我採薇意傳之天姥岑 九行 曜

何作耀 十行 白何作色 十二行 昌齡俱作元嘉 十三行

遊作迹 十七行 相何作牙 十八行 櫛作楮

五十五葉四行 窟俱作怒時作清 七行 醒毛作酣 八行 駿馬俱

作鐵驄 十行 又俱作文枳毛作軹 十一行 垂俱作再 十

二行 毛本無音字 十四行

詠史

以下二首毛本與明刻不同蓋依本集校改

荷畚至洛陽牧 胡一作 馬屯北門天下裂其七 土毛作 豺狼滿中原明

夷方濟世斂翼黃埃昏披雲見龍顏始蒙國士恩位重謀亦深所

舉無遺奔長策寄臨終東 何作 南不 毛注 一 可吞賢智苟有時貧

賤何所論唯然嵩山老而後知我言

觀江淮名山圖

刻意吟雲山尤知隱淪妙遠公何為者再詣臨海嶠而我高其風

披圖得遺照援毫無逃境遂展千里眺淡埽荆門壁明標 何作 赤

城燒青葱林間嶺隱見淮海徼但指香爐頂無聞白猿嘯沙門既

云滅獨往豈殊調 下同 本

五十六葉八行 花毛作化 十三行 蒙籠何作濛朧 十八行 如俱

作始 二十行 州毛作洲吾何作五

五十七葉二行 意已會俱作可任今 三行 乘俱作仲 四行 山俱

作上

五十八葉九行 嵩俱作蒿 十一行 皇何作王 十五行 飯何本注

飽一作 十八行 塞下曲何作望臨洮

五十九葉二行 毛本無宮字何本宮作秋 三行 秋下毛本注一作金

暫下俱注且一作六 務何作舉 七行 才下毛本注一作何

作何永下注水一作 何作水 八行 驚下毛注務一作 何作務 十

九行 達何作雅 二十行 篇何作家

六十葉八行 抱何注把一作 毛作把後注把一作

六十一葉四行 中何作間

六十二葉四行 署詩多嘆詞要妙俱作署詩言詞款要清作情 十

行 相何作想 十六行 閉作閑 二十行 透俱作遙還俱作况

六十三葉六行 今何作成 九行 肅肅何作蕭蕭

六十四葉四行 隨下何本注悲一作 到下注見一作 十五行 江俱作溪

六十五葉二行 尉俱作慰 八行 鬼俱作升卿下何本無叔字 十

五行 論俱作淪

六十六葉六行 濕下何本注緝一作 十行 然俱作人 十三行 一作

數 十八行 凝何作擬

六十七葉一行 夜俱作會 八行 竟何作意 十四行 騎毛作驕

六十八葉二行 宴下何本有劉字 十五行 平俱作不 十九行 天

毛作人

六十九葉十六行 村何作林 十九行 祕俱作校

七十葉七行 助何作動 八行 冰俱作水 十行 微毛作微 十二

行 木下有歷下舜林四字 十三行 貽毛作贈 十五行 相何

作初

七十一葉三行 雲毛作雪 八行 難毛作艱萍何作螢下注一作

十五行 闌何作圍 代俱作伐

七十三葉五行 壬戌五月二十一日從舊鈔本校一過 毛展

右河嶽英靈集卷二係汲古主人毛斧季手校本集所据云是

舊鈔本集中改正處尙未細審是否卽其分卷之妙已爲可珍
按陳振孫書錄解題總集類有云河嶽英靈集二卷唐進士殷
璠集常集等詩二百三十四首則此分卷與解題合近人撰集
書目僅据俗本分卷之三而爲之說曰推測其意似以三卷分
上中下三品奚啻癡人說夢古書可貴卽此已見余故重裝而
藏諸篋爲題數語于尾時甲寅二月二十五日古吳黃堯圃識
東城任蔣橋顧氏藏書舊家也余從其族中得來佳本最多一
日藏書盡散有書友捆載而歸邀閱之悉爲其家藏書之下乘
舊刻名鈔無一存者惟此本係汲古主人手校本急檢出以賤
直易之滄海遺珠竟爲象罔之得喜何如之堯圃

乾隆癸丑秋收

辛酉五月無錫孫毓修校錄

第	号
平	3. 11. 22
聖和學	
園短大	
園書館	

